

LA USC DI LADINS – VENERDÌ 10 GENNAIO 2014

Mendranzes: “Mondi Invisibili”

Se à serà sù tel bel teater de Perjen na lingia de scomenzadives che à abù desche fil condutor l tem de la mendranzes linguistiches

Mendranzes - L concert “Ciantà Vilotis con Antonella Ruggiero” l'é stat l'event che à avert l'an 2014 de musega de Perjen, tel bel teater del comun enaudà da pech, e che à serà chesta edizion de “Perzenland & La Valle Incantata - Il Villaggio delle Meraviglie”, na scomenzadiva nasciuda acà cater egn tel zenter de la Valsugana tel temp da Nadèl, e che chest an é stata dedichèda a la Mendranzes Linguistiches con l titol de “Mondi invisibili”.

Dai 16 de november enscin ai 6 de jené l'é stat desvalives apuntamenc de entrategniment

per la jent del post e per ghesc, con spetàcoi de bal, musega e folclor a fèr da cornisc al marcià da Nadèl.

L'event é nasciù da la colaborazion anter l Comun de Perjen (coi assessores al comerz Sergio Paoli, al Turism Franco Demozzi e a la Cultura Angela Leonardelli), l COPI (Consorzio di Comerzianc de Perjen) e le pro loco de Perjen e de la Val del Mocheni, ensema a la sociazions del paìsc, a Pergine Spettacolo Aperto, a Magic Pubblicità e con l contribut de la Provincia de Trent. Chest an dò aer tout dant temes

desche l'ambient e la solidarietà a la popolazions tocèdes dal teremot te l'Emilia Romagna, duta la scomenzadiva à volù apontin meter al zenter la mendranzes linguistiches, pean via da la più apede, chela mochena, lochèda jù apontin te la vejina “Val encantèda”, per ruèr a tocèr dut l'erch de la Elpes, con ozitegn, franco-provenzai, cimbres, ladins, todesc del Sudtirolo, carinziegn, slovens, e furlegn.

L'obietif palesà l'é stat chel de ge fèr cognoscer a n gran numer de jent, da duta la Tèlia e ence da

foravia, la carateristiches culturèles, la usanzas e tradizions e la scomenzadives de promozion linguistica de la desvaliva mendranzes etniches recognosciudes da la istituzions e da la legislazion nazionèla e europeèna, te la vida più enteressanta e gustègola, travers bai, cianties e conties.

Per l gran finèl l'é stat cernù apontin n concert tel bel e nef teater del Comun de Perjen, n teater da presciapech 500 posc, con na gran paladina e dut chel che serf, che é stat enaudà da pech e olache la

gestion é stata data sù a la Sociazion culturèla “AriaTeatro”, col diretor artistich Denis Fontanari e l responsabol di evenc musicai Corrado Bungaro. E l'é stat apontin Bungaro, gran musizist e anter l'auter diretor de l'Orchestra Terrestre, che aea tout pèrt del 2008 al bel projet “Ciantà Vilotis” de l'Istitut Cultural Ladin, a pissèr de portèr endò sun paladina chel spetàcol che prejeta la cianties per ladin con la bela ousc de Antonella Ruggiero e di furlegn Loris Vescovo e Caia Grimaz, e che à abù amò n'outa n gran suzess. (lg)